

欽定大清會典事例

卷一百三十六

吏部

處分例

欽定大清會典事例卷一百三十六

吏部

處分例

修造

修造。○順治初年定。各直省通衢大路緊要隄橋。不行豫修。以致衝決損壞者。府州縣官各罰俸一年。該撫罰俸六月。如有城池不豫先修理。以致倒壞者。罰俸六月。○康熙三年議准。官員捐資修理城郭樓臺房寨器械等項。該督撫親身詳加查驗。保奏後。若有不堅固不如式。三年以內坍塌者。仍令該督撫並督工官賠修。捐資

本工官銷去紀錄免其處分。若限內坍塌該府州縣官隱匿不報。被旁人出首者。將該管官革職。如該管官申報督撫。督撫隱匿不報。將該督撫各降二級留任。○九年題准。官員解送一應匠役。或名數短少。或不擇良工。以老病不諳之人塞責者。罰俸六月。○又題准。官員解送金甌杉木。不選擇精美。以不堪用者解送。或折損。或遲延。皆罰俸一年。布政使巡撫各罰俸六月。○又題准。官員於安插官兵居住房屋。不行修理安插。以致占住民房者。罰俸一年。○十五年題

准官員織造緞疋不精好者降一級調用。○又議准官員修造礮臺邊界烽墩不速行修造完結者降一級留任。修完之日仍還其所降之級。不行催之上司罰俸一年。○五十八年覆准水師修造戰船如有不肖營員希圖射利包修者將承修官與該營將官皆革職。督修官照徇庇例降三級調用。督撫降一級調用。○六十年題准在京各處修理工。工價五十兩以內物料價值二百兩以內者照依各處印文准其修理。其工價五十兩以上物料價值二百兩以上者。

由該修理處料估啟奏。工部差官覆覈。會同該處官員首領監修。將用過錢糧。管工官名下銷算。如多用錢糧。不行啟奏。即令承修者。將行文與承修堂司各官。皆照應奏不奏例。降三級調用。○雍正元年覆准。各省修理

行宮。並直省倉廩等項工程。一應動用錢糧事件。皆令該督撫奏。

聞。工部議覆。再行修理。工完之日。該督撫查明造冊具題。工部詳加覈算題銷。如有關繫錢糧。應啟奏事件。不行啟奏。擅自咨部請銷。而該部據咨。

完結者。即行題叅。照修理工程不行。奏請例議處。○五年議准。各省城垣督撫驗明新舊倒塌。如城垣本屬修整。偶有些小坍塌。令地方官於農隙及時修補。務令堅固。若漫不經心。致坍塌過多。該督撫查叅。將該地方官照修造礮臺等項遲延例。降一級留任。修完之日。仍還其所降之級。其原坍塌已多。必須備辦物料者。該地方官量行捐修。工竣後。將丈尺詳報督撫。委官勘明。具結申報。如果工程堅固。將捐修各官造冊具題。交部議敘。如各地方官正在興修。尚未竣

工。遇有升遷事故。將所修城垣丈尺。報明督撫。造入交盤冊內。移交接任之人。俟續修完竣。將修理之工程丈尺數目。分別新舊。造具總冊報部。儻地方官因循怠忽。不實心任事。將未修城垣捏報修完者。照修造戰船未經修完捏報完工例。革職。甚至借修城名色。科派民間者。照私派例。革職治罪。○六年議准。凡修造戰船。不能堅固。未至應修年限。損壞者。著落承修官賠修六分。督修官賠修四分。仍將承修官革職。督修官降二級調用。至修造戰船。應於定限之外稍

寬限期。小修勒限四月完工。大修拆造勒限六月完工。廣東、福建、浙江、江南、江西、湖廣等省。凡屆修造年分。各該協營於修期兩月之前。豫先估計造冊申報督撫。一面具題。一面檄行監修官。豫先撥銀。即行辦料。惟廣東之瓊州、福建之臺灣。遠隔重洋。於修期四月之前。領銀備辦。山東、天津所用物料。產自浙江。由海駕運。於修期八月之前。領銀購買。則承修之官。得以從容辦理。儻仍有違誤船工。違限未及一月。承修官罰俸一年。督修官罰俸六月。督撫罰俸三月。違限

一月以上。承修官降一級調用。督修官罰俸一年。督撫罰俸六月。違限二月以上。承修官降二級調用。督修官降一級留任。督撫罰俸一年。違限三月以上。承修官降三級調用。督修官降一級調用。督撫降一級留任。違限四月以上。承修官降四級調用。督修官降二級調用。督撫降二級留任。違限五月以上。承修官革職。督修官降三級調用。督撫降三級留任。如承修官玩視船工。將應領之帑。延挨請領者。照遲延豫備軍需例降一級調用。儻該上司等故意抑勒。以致遲

延者。將承修之官免議。其抑勒之該上司。照抑
勒不收漕運例。降二級調用。如承修官將未經
修完之船。捏以完工轉報。承修官革職。督修官
降二級調用。督撫降一級調用。如承修官申報
未完。督修官作完申報者。督修官革職。承修官
照限議處。如承修督修官申報未完。督撫捏報
完工者。督撫革職。承修督修官照限議處。○七
年議准。一應工程。該管工官不依定限完工者。
工部查叅。照玩誤工程例議處。如不照限呈遞
銷算清冊。而該司亦不依限據實覈銷者。皆照

遲延事件例。叅處。如該管工官。或有因限期已屆。修理未完。而規避處分。捏報工竣者。查出。別行指叅。按所得之罪議處。其有應繳銀兩。不遵定限繳庫完結者。即將該員叅奏革職。勒限催追。限內全完。准其開復。逾限不完。交部照侵蝕正項錢糧例治罪。仍著落家屬追還。如該司官員通同遮掩者。亦照承追虧空不力例議處。此外或有工程浩繁。辦料維艱。其工料銀數至三萬兩以上。難以依限完工者。繕摺奏聞。再行定限修竣。○又奏准。京都城牆上下。應令步

軍統領會同工部。各委官一員。凡有應行葺補修理之處。勘明報部。務於雨水之前。堅固修葺。其所委之官。俟一年任滿。再委官更代。儻官員不加緊修理。及不實力查勘者。一經查出。即行題叅。照造作遲延例議處。○乾隆二年覆准。各省墩臺營房。如有坍塌傾圮之處。儻武職不行詳報。照承查遲延例議處。文員不行修造。照修造遲延例議處。○三年議准。嗣後除修造戰船。仍照定例議處外。其內河巡哨船。照戰船原例。量為減輕。如逾違不及一月者。免其議處。一月

以上者。罰俸六月。兩月以上者。罰俸一年。三月以上者。罰俸二年。四月以上者。降一級留任。五月以上者。降一級調用。督修之員。違限一月以上者。罰俸三月。兩月以上者。罰俸六月。三月以上者。罰俸一年。四月以上者。罰俸二年。五月以上者。降一級留任。督撫違限一月以上者。免議。違限兩月以上者。罰俸三月。三月以上者。罰俸六月。四月以上者。罰俸九月。五月以上者。罰俸一年。○四年議定。凡修建工程所需物料。不必拘泥從前造報物料定價。悉照時價確估造報。

工竣之日。該管上司委官驗看。並取印結詳報。該督撫等確訪時價覈明。題咨到日。工部再行覈銷。儻承辦各官。浮開捏報。該督撫即照冒銷錢糧例指叅。如委官驗看不實。即以扶同徇隱例叅處。○五年覆准採買一切物料。工部照定例發價。如承辦官侵蝕入己者。查出照冒銷例叅處。儻有匠作搬運等費。許承辦官將緣由呈明。以聽覈奪。如該員並不呈報。經工部查出叅奏。照應申上而不申例。罰俸九月。○二十二年奏准修造河營濬柳船隻。令徐揚二道會同河

營參將。派委守備二員。公同承修。責成河營參將。遊擊督修。如修造葦營石船。派令葦左右營守備輪直承修。責成葦營參將督修。於兩月前豫行估計。領銀辦料。葦營石船。遇大修拆造。定限四月完工。小修限三月完工。河營濬柳船隻。遇大修拆造。定限三月完工。小修限兩月完工。如有遲延。將承修等官咨叅。交兵部照例議處。該管之總河道員。如不行查催。違限一月以上者。免議。兩月以上者。罰俸三月。三月以上者。罰俸六月。四月以上者。罰俸九月。五月以上者。罰

俸一年。○三十年奏准沿海礮臺邊界烽墩等項如遇損壞該營員查明移報州縣親往查勘報明督撫興修如違限不完該督撫查叅仍照前例議處其僻在內港礮臺如有坍塌處所即隨時修理仍按季造報。○又奏准凡奉

旨修理緊急工程不及先行料估覈算者酌量工程之大小給發錢糧派員速行修竣呈報自工竣之日起限十日內呈遞銷算清冊限十五日內該司覈算呈明至於一應尋常非關緊急工程俱令按工部定限如式完工即行呈報查驗再

於原辦工所。或另有續估之處。仍著原管工官承辦者。按所領錢糧日期。逐案報銷。不得借續派名色。前後牽混。以致挨延。自完工之日起。亦定限十日。呈遞銷算清冊。該司官員按限覈算明白。即行照例題銷。凡有應繳銀兩。均令各司等處。於工竣覈銷後。即行開明數目。限內如數交庫。其一應工程。該管工官員。或有不依定限完工。照修造遲延例議處。○又奏准各省修建工程。該督撫等酌量定限。於估報案內。聲明委員趕辦。逾限不完。承修官降一級留任。修完之